

Wednesday, June 18, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

CM

Chief Minister Pu Lalduhoma'n kutkawih eizawna leh sumdawna bultan duh thalaite tana hmasawna tur kawng hrang hrang sawrkarin a ngaihtuah thu a sawi.

He thu hi vawiina MZP Headquarters Serchhip ten HSLC, HSSLC leh MPSC exama tithate lawmpuina an buatsaih a hmanpui na ah sawiin Chief Minister chuan human resource development lamah sawrkarin nasa takin hma a la a ti a, Mizoram Engineering College chu zirna kalpui thuai ani dawn tih sawiin thalaite chu sawrkar hna bakah mahni kutkawih eizawna leh sumdawna hrang hrangah eizawna tlak thiamna neih a pawimawh tih sawiin hemi kawnga hmasawna turin sawrkar chuan theihtawp a chhuah dawn tih a sawi.

Chief Minister chuana bial chung Serchhip district ah zirlai ti tha tak tak leh hna hmu thar an awm chu lawmmaw atih thu sawiin zirna chu uar deuh deuh a pawimawh thu leh a phena awm zirtirtute chawimawi thiam a pawimawh thu a sawi baw.



INTERNATIONAL DAY OF YOGA

Aizawl Civil Hospital-a AYUSH Medical Officer Dr. Laltlankimi Ralte chuan Yoga chu nitin natna hrang hrang enkawl nan tangkai taka an hman thu a sawi.

Akashvani Correspondent Vanlalruata'n a kawmnaah he thu hi sawiin Dr. Laltlankimi Ralte chuan Yoga chu natna chi hrang hrang enkawl nan an hmang reng tih a sawi a. Yoga hmanga insawizawi chu Asanas tih a nih thu leh taksaah boruak tha a tihpun thu leh taksa thil tha lo te a tihhniam theih thu a sawi a. Hei hian taksa chu mahni leh mahnia intidam turin a pui thin tih a sawi.

Dr. Laltlankimi Ralte chuan Civil Hospital-a an OPD-ah chuan a bik takin kawng na, nghawng na, zan mu tha thei lo leh adangteah an hman nasat thu a sawi a. Hei mai bakah hian natna thenkhat zunthlum, BP sang leh rilru lama harsatna neiah te an hman tangkai thu sawiin Yoga chu nu naupai lai tan pawh a tha hle tih sawiin an hman tur bik insawizawina a awm vek thu a sawi a. Naupang thang lai tan te, rilru sawrbing thei lo tante leh thil dang tam tak enkawl nan a tangkai hle a ni a ti a. Heng natna bakah a sawilan loh natna dang tam takah nitin tangkai takin Yoga chu an hman tih a sawi a ni.

International Yoga Day atan Ministry of AYUSH chuan item chi hrang hrang 10 tihtur a rawn chhawpchuah thu leh hetah hian Mizoramah chuan

thingphun ‘Harit Yoga’ leh hmun khata a huhua Yoga tih, ‘Yoga Sangama’ te tih tura ruahmanna kalpui mek a nih thu a sawi bawk.



PROJECT LEAP

Ram inthlanna hrang hrangah vohbikte'n an dikna leh chanvo an hmuh theihna tur te, veivahna leh chet velna chungchangah vohbikte huap zo ruahmanna a awm theih na tur hrang hrang ngaihtuaha thutkhawm a ni.

Thutkhawmah hian DC Pi Navneet Mann chuan mipui rorelna atana inthlanna reng reng chu mi tin huap zo leh vohbikte tan remchang a nih a tul tiin, vote neih chungchangah leh inkal pawhna leh chet velna chungchangah vohbikte'n an dikna leh chanvo an hmuh a, hmaih bik an nih loh nan sawrkar chuan remchanna siamsak turin theih tawp a chhuah thin tih a sawi.

District Election Office lamin an chhinchhiah danin, Lunglei District chhunga assembly bial parukah vohbik electoral roll-a inziak lut leh chhinchhiah 397 an awm a ni.



SYNOD AID

Tunhnaia Fur ruahsur nasa vanga Lawngtlai District chhunga, Kakichhuah-a Tuilianin an chenna In a tihchhiatsak te hnen ah Mizoram Synod chuan tanpuina a hlan.

Tuilian tuar, tanpuina hlante hi Kakichhuah Vengthar a mi vek niin, Rev. H.Lalhmingmawia, Administrative Secretary, Lunglei chuan nimin khan Kakichhuah hi tlawhin tanpuina hi a hlan a, Tanpuina hlante hi chhungkaw 48 niin Presbyterian chhungkaw 8 leh LIKBK chhungkaw 42 niin, tanpuina semchhuah hi a vaiin cheng nuai 1 sing 4 sang 8 za nga a ni a,

Synod Office, Lunglei in tanpuina a hlante hi Tuilian vanga luahzui tlakloh a In chhia 41 leh thawmthat ngai In 7 a ni.



GOVERNOR

Larsap General (Rtd) Vijay Kumar Singh chuan nimin khan MoRTH, NHLML leh UD&PA Department hotute Ropeway Project chungchang a sawipui.

Larsap hian Ministry of Road Transport and Highway, National Highways Logistics Management Limited leh Urban Development & Poverty Alleviation Department hotute hi Raj Bhavan-ah kawmin sorkar laipui 'National Ropeways Development Programme - Parvatmala Pariyojana' hmanga Mizorama Ropeway siam a nih theih nana pawimawhte a sawipui a, khawpui tawt zel tur ven nan ruahmanna hrang hrang neih a pawimawh thu leh hmalak ran chu thil tihmakmawh a nih thu sawi.

Tun dinhmunah Aizawlah hmun awl a tam tawh loh avangin sorkar project kalpui turin Aizawl khawpui chhung chauh melh lo va, hmun dangte

pawh ngaihven tel zel a tul thu Larsap chuan a sawi a, inkalpawhna leh mipui veivahnate chu ngaihven hmasak ngai tih sawiin, tlangrama chengte inkalpawhna atana sorkar laipui project tha tak Parvatmala chu tangkai taka hman a nih theih nana hmelhriata, chhawr tangkai a tul thu a sawi a ni.



EVOLUTION OF YOGA

Khawvel pumah International Day of Yoga chu June ni 21 hian hman a ni dawn.

Kum 2014 khan Prime Minister Narendra Modi chuan United Nations General Assembly ah June ni 21 chu International Day of Yoga atan a rawt a, he rawtna hi United Nations General Assembly chuan pawmpuiin khawvel pumah June ni 21 chu International Day of Yoga atan hman alo ni ta a ni.

Yoga hian India ramah hmanlai atangin zung a kai thuk hle a. Indus Saraswati Valley culture thlarau lam thil tih atanga inṭana ngaih a ni a. Hun a kal zela Yoga chuan hmun pawimawh tak chang chho in, hriselna kawnga discipline pawimawh tak niin khawvel pumah kum 2014 atang khan International Day of Yoga hi hman ṭan a ni ta a ni.

Kumin 11th International Day of Yoga pual hian “Yoga for One Earth, One Health” chu thupui a hmangin Yoga chuan inpumkhatna leh damna a thlen tih hman a ni a. Yoga chuan hnam hrang hrangte, sakhua leh hnam avanga inthliarna awmlo in nun hrisel leh awmze nei zawk neih theihna a pe a ni.

